



## Communicaziun a las medias

### 30avel Top Pop Rumantsch - l'utschè da Milly

Cuira, 26-10-2012 – **Il novischem 30avel Top Pop Rumantsch deriva da la chantadura Marie Louise Werth e porta il titel “quei utschi”. Il Top Pop Rumantsch vegn preschentà per l'emprima giada ussa venderdis, ils 26-10-2012 sin l'emettur dal Radio Rumantsch.**

Top Pop Rumantsch, la renumada retscha popmusicala dal Radio Rumantsch, festivescha sia 30avla ediziun.

Per onurar quest event spezial han ils responsabels da la retscha tschernì la vusch straordinaria da Marie Louise Werth, dapi onns la figura principala dals Furbaz. Ina chantadura e musicista ch'ins na sto ni preschentar ni promover.

Cun sia vasta experientscha che tanscha da la chanzun populara sur il schlagher enfin tar il jazz avess Milly il potenzial per ina preschentaziun furiosa.

Tant dapli surprena ella qua auditur ed auditura cun ina chanzun zunt fina, zunt filigrana. In utschè inamurà è il protagonist da sia cumposiziun. Sur ina textura decanta da ghitarra acustica e clavazin sa mova la vusch virtuosa, oszillond tranter chant virginal ed intunaziun bluesica-fimentada, glischnond bainduras ad aut sco ina lodola en il blau dal firmament. Ina bella finiziun dal segund album «Top Pop Rumantsch» che cumpara proximamain, «Quei utschi» da Marie Louise Werth.

Musica, text, chant & clavazin: Marie Louise Werth

Ghitarra: Jean-Pierre von Dach

Giun: Michael Chilewsky

Cello: Daniel Pezzotti

Battaria: Rolf Caffisch

Producziun & Mix: Manfred Zazzi



## Quei utschi

Jeu less sgular tras l'aria fina  
Schar mes calzers isai sin cruna  
Sesalzar cun pial gaglina  
Mei schar purtar il vent tier tei  
Nua quei ei adina

Less prender part a tia veta  
Guder cun tei quei che ha valeta  
Schar dar il mund cumpleins dad oz  
Semiar cun tei  
Da di e notg

Oh, co quei fuss bi  
D'astgar esser quei utschi  
Oh, co quei fuss bi  
D'esser leu sper tei quei utschi

Less sesfundrar en tes egls blaus  
Ed enconuscher ils tes quitaus  
Udir dapli tia vusch carina  
Cantar cun tei canzuns  
Tgei canzuns era adina

Oh, co quei fuss bi  
D'astgar esser quei utschi  
Oh, co quei fuss bi  
D'esser leu sper tei quei utschi

Strusch ein mes patratgs tier tei  
Sentel questa febra en mei

*Top Pop Rumantsch è ina seria da producziuns da musica nova ed actuala, lantschada da RTR Radiotelevisiun Svizra Rumantscha l'onn 2005. Tut ils titels da la seria èn d'udir sin la pagina d'internet da RTR sut:*

<http://www.rtr.ch/home/dossiers/actual/Top-Pop-Rumantsch.html>

## Dapli infurmaziuns:



Radiotelevisiun Svizra Rumantscha  
Jachen Prevost  
Tel. 081 255 75 75  
E-Mail: [Jachen.prevost@rtr.ch](mailto:Jachen.prevost@rtr.ch)